

**Qinnuteqartoqartillugu qinnuteqartup qinnuteqarneraniit ullut qulit qaangiunneranni qinnuteqartoq allamik naluaarfigineqarsimangippat qinnutigineqartup inatsisitigut akuerineqartutut isigineqartalernissaa anguniarlugu Kalaallit Nunaannut suliffissarsiortut killilersimaarneqarnissaat pillugu Inatsisartut inatsisaanni § 6 imm. 3 allanngorteqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut (Inatsisartunut ilaasortat Randi Vestergaard Evaldsen aamma Justus Hansen, Demokraatit)**

### **Akissuteqaat**

(Aatsitassanut Suliffeqarnermullu Naalackersuisoq)

### **Siullermeerneqarnera**

Aallarniutigalugu Naalackersuisut Inatsisartunut ilaasortat, Randi Vestergaard Evaldsen aamma Justus Hansen Demokraatineersut aalajangiiffigisassatut siunnersuuteqarnerannut qutsavigaat.

Suariartorneq, suliffissaaleqisukinnerulersimanera taamaalillunilu sulisussanik pisariaqartitsisoqarnerunera, ukiuni makkunani atuuppoq. Ingerlatseqatigiiffiit suliffeqarfiillu arlallit sulisunik piginnaasaqartunik ujartuisarnerat annertusiartuinnavilluni.

Sulisussarsiniartarnermut suleriaatsit sunniuteqarluarnerulersinnissaat pillugu aalajangiiffigisassatut siunnersuummi siunertaasunut Naalackersuisut isumaqataapput. Taamaattoq Naalackersuisut erseqqissaatigissavaat sulisitsisut suliffeqarfiillu nunaqavissunik sulisussarsisinnaasimatinnagit taamaallaat tamanna atuuttoq, aammalu nunaqavissut salliutinneqarnissaat pillugu Inatsisartut inatsisaat pingaaruteqartoq malissallugu. Tassa avataaniik Kalaallit Nunaannut suliffissarsiortartut sapinngisaq tamaat killilersimaarneqartariaqartut. Pivusorli unammilligassarlu annertoq miserratigissanngilarput, assaat sulisinnaasut piffiit suliffiillu ilaanni annertuumik amigaataasaleqqammat.

Ullumikkut kommunalbestyrelsit kisimik ilinniagaqarsimasunik ilinniagaqarsimasuunngitsunilluunniit, avataaneersunik sulisussarsiornissaannut sulisitsisunut akuersissutinik aalajangiisartuupput. Naalackersuisut isumaqarput siunissami aamma taamaaginnartariaqartoq. Kommunalbestyrelsit taakuummata annertuumik suliffissaaleqisunik akiuiniarnermik, piginnaanngorsaanernut aammalu aningaasaqarnikkut suariartornissamut suliniuteqarnermut akisussaaqataasut. Ullut qulit qaangiunneranni ingerlaannartumik akuersissuteqartarnermik kommunalbestyrelsit aalajangiisinnaatitaallissagaluarpata najukkami ilisimasaat piginnaaneqarnerannillu annikinnerulersitsinaviangilaq. Tamatumunngalu taarsiullugu ilaatigut digitalimik aaqqiissutissat atorlugit, kommunit suliassanik suliarinnittarnerisa sunniuteqarluarnerulersinnissaa nukittorsarneqarnissaalu Naalackersuisut kissaatigineruaat.

Kommunini piffissaq suliassanik suliarinninnermut atorneqartartoq nalinginnaasumik sunniuteqarluartumik ingerlasarpoq, aammalu ulluni 14-ini suliarinninnerup sivisussuseqarnissaata inatsimmi aalajangersarneqartup iluani nalinginnaasumik akissuteqartoqartarluni. Kisitsisit aamma tamanna takutippaat. Taamaalilluni nunatsinni avataaniit sulinissamut akuersissutit 2014-imi 184-usimallutik 2017-imilu akuersinerit 450-nngorsimallutik. Peqatigisaanik itigartitsinerit 2014-imi 159-iusimallutik 2017-imilu 72-inut ikilismallutik.

Naalakkersuisut suliffeqarnermi illuatungeriit oqaloqatigisimavaat aammalu suliat ingerlasarnerisa sukkanerulersinnissaat pisariaqartinneqarneranut isumaqataapput. Tamatumunngalu atatillugu pissusiviusut ukkatarineqarnerunissaat pitsanngorsarneqarnissaannullu Naalakkersuisut peqataassapput.

Aallussiviususaaq tassaavoq, sulisitsisoq sulisussanik avataaneersunik atorfinitsitsinissaq pillugu kommunalbestyrelsimit akuersissummik tigusaqareeraangat, allaffissornerup sivikinnerulersinneqarnissaa.

Suliffeqarfiillu pakatsisimaartarnerat tunngaveqarneruvoq danskit oqartussaasuiniit qaammatini arlalinnik suliassanik sularinninnerup sivilissuseqartarneranut tunngassuteqarpoq. Tamannalu kommunalbestyrelsip sapaatip akunneri marlunni suliassanik sulariartartussaanerannut tunngassuteqarani.

Taamaattumik sulisussat avataaneersut pillugit suliassanik sularinnittarnerup sivilissusinnaasartup sivikillisinneqarnissaa pillugu danskit oqartussaasuinut isumaqatiginninniarnissamut Inatsisartuni amerlanerussuteqarluartuniit piginnaatinneqarnissaaq Naalakkersuisut kissaatigaat. Taamaaliornermi akuersinernut sulisussanik avataaneersunik atorfinitsitsinissamut tunniuttakkatsinnut nammineerluta akisussaaffeqarnerput pitsanngorsassavarput. Naalakkersuisut isumaqarput tamanna nammineerluni aalajangiisinnaanerulernissamut alloriarnerussasoq pingaaruteqartoq. Ilisimatitsissutigissavarpullu Naalakkersuisooqatigiit isumaqatigiissutaat naapertorlugu inuiaqatigiinni akuulersitsinissaq nunatsinnut tulluarsakkamik peqalernissaaq pillugu inatsisissanut siunnersuummik saqqummiussinissamut pilersaaruteqarmata.

Ikinngutitta Savalimmiormiut ukiup aallartinnerani Savalimmiuniinnissaminnut akuersissutit pillugit aalajangiinissamut piginnaatitaalersimanagerat nuannerpoq takullugu. Taamaattumik Naalakkersuisut sunniuteqarluartumik suliassanik sularinninnermik qanoq iliorlutik qulakkeerinnissimanagerat pillugu taakkua oqaloqatigilernissaat Naalakkersuisut aallartinniarpaat. Island aammattaq aaqquissuussisimavoq sunniuteqarluartorujussuarfik, aammalu ilinniartigisinnaasatsinnik.

Taamaattumik Naalakkersuisut isumaqarput kommunalbestyrelsi qanoq pitsaanerusemik sukkanerusemillu piginnaasaqartunik suliffissaaleqisunik innersuussisinnaanngippat, sulisussanik avataaneersunik atorfinitsitsinissaq pillugu ingerlaannaq, sulinissamut akuersissummik qinnuteqarnermi suliat ingerlaneranni, sunniuteqarluarnerulersitsinnaanerat pillugu angusassat ujjartorneqassasut.

Tamanna tunngavigalugu Naalakkersuisut inassutigaat Inatsisartut siunnersuut ilusimisut iluseqartillugu tapersissanngikkaat.

Tamatumunnga taarsiullugu Naalakkersuisut allannguutissatut siunnersuut manna saqqummiuppaat: **Kalaallit Nunaanni sulinissamut nunatsinniinnissamullu akuersissutit pillugit suliassanik sularinninnerup sivikinnerulersinnissaanut sunniuteqarluarnerulersinnissaannullu periarfissat pillugit Naalakkersuisut danskit oqartussaasuinik oqaloqateqarlutik aallartinnissaat pillugu Inatsisartut aalajangiiffigisassaattut siunnersuut. Naalakkersuisut UPA 2020-imi Inatsisartunut inassuteqaatinik saqqummiussisapput.**